


T2572/3803 (9)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
AUG 22 1939



卷之二十四

壬

宋英宗 神宗 哲宗 徽宗 欽宗

附遼道宗 天祚帝 梁王

西遼德宗 夏惠宗 崇宗

金太祖 太宗

卷之二十五

宋高宗 附西遼感天后 仁宗

承天后 夏仁宗上 金熙宗

海陵王 世宗上

卷之二十六

宋孝宗 光宗 寧宗

附西遼直古魯 夏仁宗下 桓宗

襄宗 神宗 獻宗 金世宗

章宗 衛昭王 宣宗 蒙哀祖



人代紀要卷之二十

四書佛大學漢和
書館珍藏印

明吳興顧

應祥

編集

大埔黃宸校刊

江陰湯明善

應祥

庠生倪佩同校

甲辰宋英宗治平元年

正月改元

五月太后還政韓琦撤簾

乙巳

契丹咸雍元年

議崇奉漢王典禮

按漢宣帝不追尊史皇孫蓋當時嫌戾太子反
之故然亦即園起廟稱為悼考但不追尊為帝



耳至於光武崛起南陽以再造帝業却乃上繼元帝而不考南頓君此禮官之失也宋英宗自幼育于仁宗宮中又比二君不同宜以仁宗爲考而稱濮王爲本生父不必追尊始爲允當

富弼足疾求解政以使相鄭國公判揚州張昇請

老判許州 陳旭爲樞副

文彥博自河南入覲以爲樞密使呂公弼樞副

秋八月京師大水水漂民屋溺死無主者千五百

八十八

是年春正月契丹群臣上其主尊號曰聖文神武

全功大畧廣智聰仁睿孝天祐皇帝大赦改元咸
雍立梁王濬爲太子

丙午

翰林學士范鎮侍御史呂誨范純仁監察御史呂
大防同知諫院傅堯俞等俱以議禮罷司馬光求
去不許呂公著請還誨等不從亦罷

冬十一月帝有疾立穎王頊爲皇太子

是年正月契丹改國號爲遼

丁未

春正月帝崩在位四年壽三十六謚憲文肅武宣
孝皇帝廟號英宗堊永厚陵長子頊即位年二十
是爲神宗皇帝 立向敏中女向氏爲皇后

司馬光爲翰林學士遷御史中丞論張方平不從
復還翰林 歐陽脩爲呂誨所詆修薦蔣之奇爲
御史衆目之奇爲姦邪之奇遂誣劾修之奇被黜
修罷 曾公亮疾韓琦薦王安石爲翰林學士韓
琦求罷以爲司徒兼侍中判相州 吳奎樞副罷
陳旭亦罷 以呂公弼爲樞密使 張方平趙抃
參政邵亢樞副方平父喪去位

戊申宋神宗熙寧元年

夏惠宗乾道元年

趙槩唐介參政 以孔若蒙襲封衍聖公
陳升之樞密升之即旭

初封太祖曾孫從式爲安定郡王奉太祖祀
是年二月夏主諒祚卒年二十一謚昭英皇帝廟
號毅宗子秉常立年七歲改元乾道

巳酉 以富弼同平章事王安石參政

立制置三司條例司行新法陳升之王安石領其
事蘇轍呂惠卿檢詳文字章惇條例官曾布檢正
中書公事 唐介辨新法憤卒

以新法不行罷知開封府滕甫翰林學士鄭獬宣
徽使王拱辰知制誥錢公輔

程顥權監察御史裏行 御史中丞呂誨劾王安

石罷知鄧州 判國子監范純仁劾王安石出知

和州 蘇轍言新法不便出為河南府推官

富弼罷 陳升之平章事呂惠卿崇政殿說書

韓絳置制三司條例 張載崇文院校書辭歸

庚戌 韓琦請罷新法王安石稱疾諭起琦解河北安撫

止領大名 始以策試進士葉祖洽附會王安石

首選 置刑法科 司馬光論守法辭樞副尋罷

知未興軍 呂公著趙抃程顥俱罷 李定稱新

法便民以諂王安石得監察御史裏行知制誥宋

敏求蘇頌李大臨封還制書俱落職人謂熙寧三

舍人 立保甲法 行募役法 翰林學士范鎮

極言新法之害致仕 陳升之罷 韓絳王安石

同平章事王珪參政 是年遼立賢良科

辛亥

夏天賜禮盛國慶元年

王安石更定科舉罷詩賦以經義策論試士

王雱崇政殿說書 司馬光罷 蘇軾試進士發

策忤王安石出判杭州 鄧綰附王安石為侍御

史判司農寺 歐陽脩以太子少師致仕貶富弼

徙判汝州落使相 御史劉摯論安石出監衡州

倉 呂誨卒 同知諫院唐垌劾王安石貶潮州

別駕 鬻坊場河渡祠廟

是年夏改元天賜禮盛國慶

壬子 置邏卒察謗時政者 富弼致仕 歐陽修卒

行市易保甲法 詔宗室非袒免親者許應舉

是年南平王李日尊死子乾德嗣封交趾郡王

癸丑 文彥博罷 大儒周敦頤卒

呂惠卿為翰林學士

甲寅 鄭俠進安上門圖下獄

王安石免韓絳平章事呂惠卿參政

是年遼生女直部烏迺古卒金天會中追謚惠桓

皇帝第二子劾里鉢嗣

十二月遼改明年為太康

乙卯

遼太康元年

鄭俠進君子小人圖編管英州 王安石弟安國

諫峻法放於田里 沈括造奉元曆又使遼圖其

山川險易為圖上之 王安石復起平章事呂惠

卿忌其復用王雱諷御史中丞鄧綰發惠卿姦利

事惠卿免知陳州 割北邊地七百里畀遼

遼北院樞密使耶律乙辛專政皇后蕭氏被誣賜

死

丙辰

夏大安元年

交趾陷邕州知州蘇緘死節

王雱以鄧綰所列呂惠卿事下制獄惠卿知之上書訟安石安石咎雱憂憤疽發背死

呂惠卿以王安石薦得參政鄧綰附王安石而得美官本惠卿黨也及惠卿得權則又忌安石而訐其私書鄧綰又附王雱而陷惠卿小人見利忘義反覆至此書之以爲後世戒

鄧綰出知虢州

冬十一月王安石免以使相判江寧府

以吳克王珪平章事馮京知樞密

是年夏改年號大安

丁巳

河南處士邵雍卒 同知太常禮院張載卒

十二月改明年爲元豐

遼耶律乙辛誣構皇太子濬廢爲庶人復遣人殺之

戊午元豐元年

以王安石爲集禧觀使封舒國公

呂公著薛向同知樞密使

己未

蔡確參政 蘇軾以詩譏訕下獄貶爲黃州團練

副使坐詩案黜罰者二十二人

庚申 章惇參政 吳克罷

遼耶律乙辛欲害太子之子延禧遼主因獵覺其
專出乙辛知興中府封延禧為梁王置兵衛之
是年南詔楊義貞弒其君連義纂立高智昇平之
立連義子段壽輝

辛酉 章惇有罪免

夏人幽其主秉常詔宦官李憲叩五路兵討之不
克潰還

是年南詔高昇泰廢其君壽輝 段正明

壬戌

行新官制改同中書門下平章事為尚書左右僕
射參知政事為中書門下侍郎尚書左右丞

以王珪為尚書左僕射兼門下侍郎蔡確為尚書
右僕射兼中書侍郎章惇為門下侍郎張藻為中
書侍郎 再舉伐夏

知延州沈括請城永樂夏人入寇給事中徐禧帥
師救之敗死士卒役夫死者六十萬人帝臨朝大
慟沈括隨州安置

癸亥

貶宦官李憲為熙河都總管 夏主秉常復修貢
司徒富弼卒 追封孟軻為鄒國公

文彥博致仕

高麗王徽卒謚曰文子勲嗣尋卒謚曰順

遼耶律乙辛伏誅

甲子

封太祖後世準為安定郡王 詔以孟軻配享孔

子荀况蘭陵伯楊雄成都伯韓愈昌黎伯從祀

司馬光上資治通鑑

遼改慶州太安軍為興平以明年為大安元年

乙丑

遼大安元年

春正月帝有疾三月立第六子延安郡王傭為皇

太子賜名煦帝崩在位十八年壽三十八謚英文

烈武聖孝皇帝廟號神宗葬永裕陵太子煦即位

年十歲高太后臨朝首罷新法十餘事

以顏回孟軻配享孔子

司馬光自洛入臨為門下侍郎

蔡確韓縝為尚書左右僕射 章惇知樞密

賜孝子徐積粟帛 呂公著為尚書左丞

王珪卒 蘇軾出知登州

召程顥為宗正寺丞未至卒年五十四

是年遼封三韓王勲之子運為高麗王

續通鑑謂王珪以文學見推流輩然自執政至

宰相凡十六年無所建明時號三旨宰相愚以
為不特此也其附安石排蘇軾真小人耳

丙寅宋哲宗元祐元年

夏天安禮定元年

蔡確罷知陳州 司馬光為尚書左僕射是年九

月卒年六十八贈太師溫國公謚文正

呂公著為門下侍郎尋為尚書右僕射

李清臣呂大防尚書左右丞大防尋為中書侍郎

章惇免 范純仁同知樞密 程頤崇政殿說書

王安石卒 起文彥博平章軍國重事時年八十

一 韓維為門下侍郎 呂惠卿建州安置

蘇軾為翰林學士 范鎮為門下侍郎不拜

劉摯為尚書右丞 改封衍聖公若家為奉聖公

是年夏改元天安禮定秋七月夏主秉常殂年三

十六謚康靖皇帝廟號崇宗葬獻陵子乾順立生

三歲

丁卯

夏崇宗天儀治平元年

程頤議坐講蘇軾疾程頤不近人情頤門人朱光

庭劾軾謗訕御史中丞胡宗愈等劾頤不宜在經

筵乃罷頤管勾西京國子監朝士分黨攻擊洛黨

以頤為首蜀黨以軾為首朔黨劉摯梁燾王巖叟

劉安世為首呂大防范祖禹不立黨

進封李乾德為南平王 夏改元天儀治平

戊辰 呂公著為司空同平章軍國事 呂大防范純仁

尚書左右僕射孫固門下侍郎 劉摯中書侍郎

王存胡宗愈尚書左右丞 范鎮卒

是年高麗王堯卒叔父熙嗣

己巳 呂公著卒 蘇軾罷 范祖禹為翰林學士

范純仁王存罷 劉摯傳堯諭門下中書侍郎

韓忠彥許將尚書左右丞 分經義詩賦為兩科

罷明法科

庚午 太師文彥博致仕 蘇轍為御史中丞

韓忠彥同知樞密蘇頌尚書左丞 許將罷

辛未 夏天祐民安元年

蘇轍為尚書右丞尋罷 蘇軾為翰林學士承旨

尋罷知穎州 傳堯俞卒 罷劉摯知鄆州

是年夏改元天祐民安

壬申 立皇后孟氏 蘇頌尚書右僕射梁燾鄭雍尚書

左右丞韓忠彥知樞密 蘇轍范百祿為門下侍

郎 召蘇軾為禮部尚書兼端明殿侍讀學士

是年遼生女直部節度使劾里鉢卒天會中追謚

聖肅皇帝廟號世祖弟頗刺叔嗣

癸酉 蘇頌范百祿罷 梁燾罷 范純仁為尚書右僕

射 秋九月高太后崩 冬十月帝始親政范祖

禹上疏不聽 以楊畏言復章惇呂惠卿官秩貶

劉安世知成德軍

甲戌紹聖元年

以李清臣為中書侍郎鄧潤甫尚書右丞

呂大防蘇轍范祖禹范純仁俱罷 進士畢漸以

對策希時首選 章惇為尚書左僕射兼門下侍

郎 夏四月翰林學士曾布請改元紹聖

以王安石配享神宗廟庭 貶蘇軾知英州尋安

置于惠州 蔡京為戶部尚書 追奪司馬光呂

公著王巖叟贈謚貶呂大防劉摯蘇轍等

重修神宗實錄蔡卞為翰林學士安置元祐史官

范祖禹趙彥若黃庭堅等于遠州

是年遼生女直部節度使頗刺淑卒天會中追謚穆

憲皇帝皇統五年增謚肅宗明睿穆憲皇帝母弟

盈哥嗣是為金穆宗

南詔王正明避位為僧國人奉高昇泰為主改號

大中國

遼改明年為壽隆

己亥

遼壽隆元年

監察御史常安民論蔡京貶滁州監酒稅

丙子

廢孟后為王清妙靜仙師法名冲真居瑤華宮

韓忠彥罷 竄范祖禹賀州劉安世英州

是年南詔高昇泰死遺命其子泰明立段氏餘子

正淳改號後理國高氏世相之

丁丑

李清臣免 追貶元祐宰執司馬光呂公著等官

流呂大防於嶺南道卒 蔡卞為尚書左丞

降致仕文彥博為太子少保卒 編管程頤涪州

徙蘇軾昌化軍范祖禹賓州劉安世高州

戊寅元符元年

六月改

咸陽民獻玉印蔡京以為秦璽因而改元

再竄范祖禹劉安世于化梅州祖禹尋卒

編管杭州通判秦觀于橫州 章惇蔡卞請追廢

宣仁太后帝不從

己卯

夏永安元年

立劉賢妃為皇后右正言鄒浩諫竄于新州

夏改元永安

庚辰

春正月帝崩在位十五年壽二十五謚欽文睿武

昭孝皇帝廟號哲宗葬永泰陵皇弟端王佶即位
年十九歲是謂徽宗神宗第十一子也 向太后
臨朝 尊劉后爲元符皇后 立皇后王氏
復廢后孟氏爲元祐皇后 召陳瓘鄒浩 許劉
摯梁燾歸葬錄其子孫 復元祐黨人范純仁等
官徙蘇軾等于內地 追復元祐宰執文彥博司
馬光等官爵 以陳瓘言免蔡卞放章惇于潭州
韓忠彥尚書左僕射曾布右僕射 翰林學士承
旨蔡京免 召程頤判西京國子監

辛巳宋徽宗建中靖國元年

遼天祚帝乾統元年

向太后崩 范純仁卒 貶章惇雷州司戶

罷權給事中陳瓘復蔡卞邢恕等官 蔡京結交
內侍童貫道錄徐知常又以曾布引薦復爲翰林
學士 改明年爲崇寧

遼主耶律洪基卒于混同江年七十謚仁聖大孝
文皇帝廟號道宗孫燕國王耶律延禧嗣位年二
十七是謂天祚帝改元乾統

壬午崇寧元年

以蔡確配享哲宗廟 追封孔鯉爲泗水侯孔伋
爲沂水侯 命宦官童貫製器于蘇杭州

韓忠彥罷追貶元祐黨籍司馬光等官爵禁其子孫不得官京師 許將溫益為門下中書侍郎

蔡京趙挺之為尚書左右丞蔡京尋為尚書右僕射 曾布因與蔡京忿爭出知潤州 復貶孟后

為仙師出居瑤華宮 蔡卞知樞密事 立元祐

黨人碑于端禮門 蔡京請興學貢士作辟雍

追封伯夷為清惠侯叔齊為仁惠侯

癸未

蔡京為尚書左僕射兼門下侍郎 詔黨人子弟毋得至闕下命州縣俱立黨人碑 除直秘閣程

頤名 詔童貫監洮西軍及安撫王厚復湟州

張商英罷 詔毀范祖禹唐鑑及蘇黃秦觀文集

遼封興宗孫耶律淳為越王

遼生女直部節度使盈哥卒廟號穆宗後追謚章

順孝平皇帝兄子烏雅東立世祖長子也

甲申 以蔡京長子攸為秘書郎 用方士魏漢津言定

樂鑄九鼎 置書畫算學 許將免 趙挺之吳

居厚為門下中書侍郎 賜辟雍殿名大成以王

安石配享孔子位次孟軻復封孔子後為衍聖公

元加孔子大成本於此 罷科舉法專取士學校

王厚復廓州加蔡京守司空封嘉國公

乙酉 始令州縣學以諸儒從祀孔子 蔡卞罷

賜信州道士張繼元為虛靖先生 朱勗領花石
綱 章惇死于睦州

丙戌 星變毀黨人碑 蔡京免 進士蔡疑以阿附得

首選尋為給事中 趙挺之為尚書右僕射

改明年為大觀

丁亥大觀元年

復以蔡京為尚書左僕射兼門下侍郎

趙挺之免 何執中為門下侍郎鄧洵武為中書

侍郎洵武尋免 蔡攸為龍圖閣學士兼侍讀

立八行科取士孝友睦婣妊恤忠和有此八行補

大學上舍 程頤卒年七十五 加蔡京大尉

太廟齋郎方軫請誅蔡京下獄流嶺南

乾寧軍言黃河清八百里

戊子 童貫復洮州加司空 賜蔡京玉帶

始以孔伋從祀

己丑 右正言陳禾劾童貫帝拂衣起禾引落裾中丞盧

航奏禾狂妄謫監信州酒稅 蔡京有罪免以楚

國公致仕何執中為尚書左僕射

詔算學以黃帝為先師 播州楊文貴內附

庚寅 立詞學兼茂科 彗出奎婁貶蔡京為太子少保
 出居杭州 張商英為尚書右僕射兼中書侍郎
 十一月祀園丘改明年為政和
 十二月遼改明年為天慶

辛卯政和元年

遼天慶元年

張商英罷 羈管陳瓘于台州 童貫使遼燕人

馬植詭名李良嗣因童貫獻滅遼策賜姓趙

解池生紅鹽

壬辰

召蔡京為太師宴于內苑賜第京師三日一至都
 堂議事進封魯國公 更定官名以太師太傅太

保為真相三少副之尚書左僕射為太宰兼門下
 侍郎右僕射為少宰兼中書侍郎 加童貫太尉

癸巳

追封王安石為舒王王雱為臨川伯從祀

何執中為太宰少師 蔡京進封魯國公賜方士

王老志號洞微先生王仔昔號通妙先生

冬十一月祀天子園丘蔡攸奏天神降詔百官

是年遼生女直部節度使烏雅束卒年五十三天

會中追謚恭簡皇帝皇統四年號其藏曰喬陵增

謚康宗獻敏恭簡皇帝弟阿骨打立自稱都勃極

烈是謂金太祖

甲午 置道階

女直抗遼遼伐之大敗 始祭地于方澤以太祖配

乙未

金太祖收國元年

夏雍寧元年

立定王桓為皇太子 童貫領六路軍事

王厚攻夏全軍皆沒童貫匿不以聞

女直完顏阿骨打始稱皇帝更名旻國號大金改

元收國以弟吳乞買為諳班勃極烈

遼主親征金大敗而還

初金主至混同江無船渡金主使一人導前乘

赭鳥徑涉日視吾鞭所指而行諸軍隨之水及馬腹既濟使舟人測其渡處深不得其底夷狄之興豈偶然哉

夏改元雍寧

丙申

賜方士林靈素號通真達靈先生立道士學

蔡攸倡議作上清寶籙宮 詔蔡京三日一朝正

公相位總治三省事幸其第 上玉帝尊號太上

開天執符御曆含貞體道昊天玉皇上帝

遼高永昌據遼陽以叛改元隆基求援于金金遣

都統幹魯執而殺之東京州縣及南路俱降除遼

法省賦稅立猛安謀克群臣上尊號曰大聖皇帝
改明年爲天輔

丁酉

金天輔元年

會道士于上清寶籙宮凡二千人道籙院上章冊
帝爲教主道君皇帝 給道士俸 爲林靈素升
温州爲應道軍 上地祇號曰承天效法厚德光
大后土皇地祇 作定命寶 命蔡京五日一赴
都堂治事起復鄭梈爲太宰余深爲少宰
童貫領樞密事賜坐 方士王仔昔下獄死
作萬歲山于京師周十餘里 有星如月南行

是年大理入貢以其主段和譽爲雲南節度使封
雲南王

戊戌重和元年

十一月改

遣武義大夫馬政浮海如金請燕雲地

賜林靈素通真達靈元妙先生張虛白通元冲妙
先生造帝誥天書雲篆惑衆 以蔡京言作道史
加童貫太保 秋九月掖庭火焚死甚衆
十一月己酉朔大赦改元

己亥宣和元年

二月改

詔更佛號大覺金僊僧爲德士寺院爲宮觀德士

許入道學 宮觀道士與監司郡縣客禮相見

余深為太宰王黼為少宰 張邦昌為尚書右丞

尋為左丞 童貫遣熙河經畧劉法攻夏敗死更

以捷聞

追封莊周為微妙元通真君列禦寇為致虛觀妙

真君配享混元皇帝 加童貫太傅封涇國公

帝幸蔡京第傳觴行家人禮加蔡攸開府儀同三

司 秘書省正字曹輔諫微行編管郴州

楊時為秘書郎 是年五月龍見京師茶肆中兵

士取而食之大雨七日水高十餘丈

金始頒女直字

遼冊金主為東懷國皇帝不受

庚子 林靈素有罪放歸田里尋死 趙良嗣如女直約

攻遼許歲幣如遼數 蔡京與子攸權勢相軋帝

厭京以太師魯國公致仕

是年建德軍青溪民方臘以誅朱勔為名作亂自

稱聖公改元永樂 夏改元元德

辛丑 遼保大元年

淮南盜宋江以三十六人橫行河朔知海州張叔

夜擊降之 童貫承制罷蘇杭造作局及化石綱

黑青見禁中 童貫執方臘加太師楚國公

鄭居中領樞密 張邦昌為中書侍郎以孔端

友襲封衍聖公

是年春正月丁酉朔遼改元保大

遼南面都統耶律余覲被誣降投金

遼天祚四子長趙王習泥烈母趙昭容次晉王

敖廬幹母蕭文妃次秦王定次許王寧皆元妃

生惟敖廬幹賢國人屬望元妃兄樞密使蕭奉

先恐秦王不得立潛圖之適文妃作詩諷諫遊

攻天祚銜之文妃姊適耶律撻曷里妹適余覲

蕭奉先諷人誣駙馬蕭昱及余覲等謀立晉王

而尊天祚為太上皇蕭昱撻曷里被誅文妃賜

死獨晉王未忍加罪余覲在軍中聞之大懼遂

叛入金按余覲之叛非其本心蕭奉先之謀天

祚不明激之也

壬寅 蔡攸為少保梁師成開府儀同三司

金兵克遼中京時遼主方暉于鴛鴦樂耶律余覲

引金兵卒至甚憂蕭奉先曰余覲此來欲立甥耳

為社稷計何惜一子明其罪而誅之則彼自退矣

遼主乃賜晉王敖廬幹死或勸之亡敖廬幹曰安

忍以蕞爾之軀而失臣子節遂就死敖盧幹素
有人望諸軍無不流涕由是人心解體金兵逼行
宮遼主走雲中遺傳國璽棄乾河爲金所得遼主
至夾山方悟蕭奉先不忠誅之 遼主之出也留
宰相張琳叅知政事李處溫與秦晉國王耶律淳
守燕遼主在夾山命令不通李處溫與大臣耶律
大石左企弓等立淳爲帝淳興宗第四孫也上尊
號曰天錫皇帝改元建福遙降遼主延禧爲湘陰
王

史謂敖盧幹重君父之命不亡而死申生其恭

乎是固然矣然孝子於親小杖則受大杖則走
敖盧幹宿有人望當時遼兵尚多脫身在外招
集豪傑恢復舊物以迎遼主不亦偉乎惜乎無
以此義告之者也

李處溫輩既援唐靈武故事以立耶律淳却廢
其主爲湘陰王則非矣

以童貫爲宣撫使蔡攸爲副使帥師十五萬應金
攻遼王黼括天下丁夫計口出錢六千二百萬緡
充用敗于白溝詔班師遼遣人來責以救災恤憐
之義童貫不納以統制种師道曾諫伐遼遂密劾

師道助賊降右衛將軍致仕

是年六月耶律淳卒年六十偽謚孝章皇帝廟號宣宗遺命遙立秦王定尊淳妻蕭氏爲皇太后稱制改元德興蕭氏數李處溫罪而殺之上表于金求立秦王定金主不許金師至居庸關厓石自崩遼兵不戰而潰阿骨打至燕遼統軍高六等開門待之宰相左企弓等率百官上表迎降 遼主奔四部族

童貫等再舉伐遼以劉延慶爲都統制朝散郎宋昭諫編管海州 遼涿州留守郭藥師以涿易二

州來降童貫受之以其兵隸延慶攻遼敗績燕山士卒蹂踐死者百餘里歷年軍儲俱盡藥師猶進安遠軍丞宣使 遣趙良嗣如金求營平灤三州不許

萬歲山成更名艮嶽

是年高麗王僖卒子楷立

癸卯

金太宗天會元年

遼知北院樞密事奚回离保即箭筈山自立爲奚國皇帝改元天復

以王安中知燕山府郭藥師同知府事藥師入朝

賜甲第姬妾宴賞甚厚

遼耶律淳妻蕭氏走至四部族遼主殺之追廢耶律淳為庶人

淳之立非其本意蕭氏又能誅李處溫立秦王定亦知大義者遼主殺之過矣

趙良嗣如金許歲幣四十萬之外加燕京稅錢一百萬緡金始以燕涿易檀順景薊來歸惟七空城而已封童貫徐豫國公王黼太傅治三省事鄭居中太保蔡攸少師居中辭不拜

金兵追遼主戰于白水灤遼主敗走雲內趙王習泥烈秦王定許王寧俱被執惟次子梁王雅里得免遼主奔夏其臣蕭特烈等立雅里為帝改元神曆

遼史載延禧四子不載雅里恐失之也

遼奚回離保為其下所殺

金以平州為南京以遼人張欷為留守徙燕民過平州欷欲興復遼室召左企弓等責其叛降之罪殺之以其地歸宋詔改建平軍以欷為節度使遼蕭幹就奚王府稱神聖皇帝改元天嗣郭藥師平之加藥師太尉

楊時為邇英殿說書 童貫致仕以內侍譚楨為
兩河燕山宣撫使

禁元祐學術毀司馬光等文集

秋八月金主阿國打卒于行宮年五十六謚應乾
興運昭德定功仁明莊孝大聖武元皇帝廟號太
祖葬睿陵弟吳乞買即位更名晟改元天會是謂
金太宗

冬十月遼雅里卒蕭特烈立聖宗孫耶律朮烈為
帝尋為亂兵所殺

十一月幸王黼第觀芝大醉

金襲平州張穀奔燕山詔王安中斬穀首畀金
納穀啓釁又不能庇函其首以畀之使降將解
體失策甚矣

甲辰 夏稱藩于金

金索趙良嗣所許糧二十萬石不與金人大怒
復以童貫領樞密院事兩河燕山路宣撫使
白時中為太宰李邦彥少宰 王黼有罪免

蔡京復領三省事昏眊不能事皆決於其子蔡絛
河北山東盜起

都城女子生髭長六七寸甚秀美度為女道士

乙巳 春正月金將婁室追獲遼上延禧于應州降爲海濱王遼亡

契丹阿保機自後梁均王丙子稱帝晉高祖二年丁酉改號遼穆宗復號契丹至道宗復號遼傳九主共一百五十年爲金太宗所滅其所都上京今遼東三萬衛是其故處

遼耶律大石奔至西域自立于起兒漫號葛兒罕上漢尊號曰天祐皇帝改元延慶立妻蕭氏爲昭德皇后是爲西遼

勒蔡京致仕

按蔡京鍾愛其少子條擅權用事蔡攸數言于帝請殺條帝不許欲竄之京力丐免停侍養褫其侍讀毀賜出身敕以撼京而京猶未有去志乃命童貫至其家逼令上章京泣曰主上何不相容不得已以章授貫帝乃命詞臣代作三表求去降詔從之夫蔡京父子相軋攸始欲罷其父既而又欲殺其弟京爲相日久爲君上所厭而貪恋不已鄙夫患得患失一至如此真可笑也

封童貫爲廣陽郡王

劉安世卒

有狐升御榻

而坐

金粘沒喝幹離不分道南侵

童貫自太原逃歸金兵陷朔代圍太原郭藥師叛
入金爲鄉導盡陷燕山州縣 罷花石綱及內外
置造局 詔天下勤王 下詔罪已

宋徽宗聽童貫王黼之言欲得燕雲之地竭天
下之財力以夾攻遼而王師屢敗既而所得惟
七空城而已且又甘心於納歲幣輸租稅自處
以弱輕許以糧不能踐言納叛臣張瑄又不能
庇以致郭藥師叛去益知我虛實乃敢長驅而

入如履無人之境并中原而失之向使金兵攻
遼之初能張皇六師申救災恤隣之義與之約
曰共退金兵宜還我石晉所獻之地或免我歲
幣策之上也如不能然固守邊疆靜以治內金
虜雖強豈敢無繫而動犯我中原乎

宇文虛中草詔曰朕獲承祖宗休德託于士民
君王之上二紀于茲雖兢業存於中心而過咎
形于天下蓋以寡昧之資藉盈成之業言路壅
蔽導諛日聞恩倖持權貪饕得志縉紳賢能陷
于黨籍政事興廢拘于紀年賦歛竭生民之財

成役困軍旅之力多作無益侈靡成風利源酷
權已盡而牟利者尚肆誅求諸軍衣糧不時而
冗食者坐享富貴災異謫見而朕不寤衆庶怨
懟而朕不知追惟已愆悔之何及思得竒策庶
解大紛望四海勤王之師宣二邊禦敵之畧未
念累聖仁厚之德涵養天下百年之餘豈無四
方忠義之人來徇國家一日之急應天下方鎮
郡縣守令各帥衆勤王能立竒功者並優加獎
異草澤異材能爲國家建大計或出使疆外者
並不次任用中外臣庶並許直言極諫

詔熙河經畧使姚古秦鳳經畧使种師中入援
以吳敏爲門下侍郎 十二月帝傳位皇太子桓
即位尊帝爲教主道君太上皇帝 以李綱爲兵
部侍郎 耿南仲僉書樞密院事 太學生陳東
上書請誅蔡京王黼童貫梁師成李彥朱勔六人
丙午宋欽宗靖康元年

守黎陽內侍梁方平兵潰金兵渡河無一人敢拒
者 竄王黼永州開封尹聶昌遣人殺于雍丘李
彥賜死並籍其家 太上皇出奔避敵蔡攸爲行
宮使童貫以勝捷軍自隨蔡京盡室南行

宰執請帝出幸襄鄧李綱諫止以綱爲尚書右丞
東京留守李邦彥爲太宰張邦昌爲少宰趙野
門下侍郎王孝迪爲中書侍郎

春正月金幹離不軍直抵汴城據牟駝岡遣使問
納張穀事令執送童貫譚禎詹度且言上皇朝事
已往不必計今與少主別立盟誓結好仍索親王
宰相詣軍前李綱請行帝不許遣李稅至金營割
地求和

李稅至金營見幹離不北面再拜膝行而前恐
怖喪膽幹離不謂曰汝家京城破在頃刻所以
不攻者以少主故欲存趙氏宗社今欲議和當
輸金五百萬銀五千萬牛羊萬頭表段百萬尊
金帝爲伯父歸燕雲之人在漢者割中山太原
河間三鎮而以宰相親王爲質送大軍過河乃
退稅唯唯不敢出一語乃與金使同來李邦彥
力勸帝從其議括借都城金銀及倡優家財得
金二十萬兩銀四百萬兩而民間已空李綱言
金人所需竭天下且不足况都城乎三鎮國之
屏蔽割之何以立國遣質宰相當往親王不當
往若遣辯士姑與之議宿留數日大兵四集彼

孤軍深入雖不得所欲亦將速歸此時與之盟
和亦可久李邦彥等言都城破在旦夕尚何有
三鎮而金幣之數亦不足較李綱以言不用求
去慰留治兵乃作誓書稱伯大金皇帝姪大宋
皇帝金幣割地一依其言宋室君臣怯懦如此
故備錄以爲後世戒

出內帑及括借士民金帛遣康王構少宰張邦昌
往金營爲質 都統馬忠敗金兵于順天門金兵
少歛种師道以兵入援請緩給金幣擊其惰歸不
從

以太學生陳東言貶梁師成彰成節度副使開封
吏護送縊殺以暴死聞

姚平仲襲金營不克而遁

李綱雖忠義然兵家機畧非其所長姚平仲欲
擅其功故有此敗种師道言劫寨已誤然兵家
亦有出其不意者今夕再遣分道攻之亦一奇
也如猶不勝每夕以數千人擾之不十日賊遁
矣李邦彥不從

金人詰責用兵之故罷李綱以謝罪太學生陳東
等及都民數萬人上書留綱復以綱爲尚書右丞

京城防禦使

除元祐黨籍學術之禁廢苑囿宮觀可以與民者以肅王樞爲質于金康王構還

宇文虛中奉割三鎮地畀金人遣使告辭而去种師道請俟其半渡擊之不許

初金人犯城蔡懋禁不得輒施矢石將士積憤李綱復用下令能殺敵者厚賞衆無不奮躍金人懼稍稍引却及得割地詔遂不俟金幣數足而去

夫虜以孤軍深入留頓日久苟能以所括金銀鼓舞壯勇出其不意擊之未有不勝者也惜當時謀國者一味怯懦哀哉

李邦彥免以張邦昌爲太宰吳敏爲少宰李綱知

樞密 种師道罷 楊時爲國子祭酒

張邦昌李稅免徐處仁爲太宰唐恪爲中書侍郎

何臬爲尚書右丞 太上皇自鎮江還 立子諶

爲皇太子 耿南仲爲門下侍郎

復以詩賦取士 召河南處士尹焞至賜號和靖

遣還 以楊時言罷王安石配享孔子猶從祀時

諸生習王氏學以取科第反以時爲邪說中丞陳

過庭諫議大夫馮澥上疏詆時以徽猷閣待制致仕

王安石創立新法引用姦邪宋室之亂實基於此當時配享孔子蓋出蔡京父子之意無足恠者後公論已定而儒者猶謂其學爲正學殆不可曉夫學體用一原者也豈有行之足以亂天下而反謂之正學耶

金兵圍太原詔种師中姚古救之兵潰師中戰死古安置廣州以李綱爲兩河宣撫使尋召還天狗星隕彗出紫微垣長數丈拂帝座掃文昌大

臣獻諛以爲夷狄將衰竄蔡京儋州道死童貫

吉陽軍趙良嗣柳州俱遣人殺于貶所函首至闕下梟于市蔡攸朱勔俱遣使殺之籍勔家田至三十萬他物稱是復以种師道爲兩河宣撫使尋罷師道卒金人復分道入寇遣使乞緩師

金人陷太原都總管王稟赴汾水死唐恪耿南仲主和議罷勤王兵冬十月言者論李綱專主戰議喪師費財罷知揚州尋安置建昌軍

十一月金粘沒喝自太原趨汴至河外宣撫折彥質以兵十二萬拒之金兵以虛聲擊戰鼓達旦彥

質軍奔潰金兵遂渡河不復言三鎮欲盡得兩河地遣耿南仲聶昌割地畀金兩河民不從聶昌爲絳人所殺南仲奔相州

南道張叔夜以兵勤王勸帝如唐明皇故事整詣襄陽以圖幸雍不從郭京詭言以六甲法能擒金將直擊至陰山乃止孫傳何臬深信之以爲成忠郎用七千七百七十人年命合六甲者皆市井游惰其黨或稱六丁力士北斗神兵或稱天闕上將京云非至危急吾兵不出

金兵攻城范瓊以千人出戰渡河水泮沒五百人郭京大敗墮死於獲龍河填屍皆滿京詭言下城作法逃去城遂陷

郭京走沿路稱撒豆成兵惑衆至三千餘人屯洞山欲立宗室爲帝人知其誤國刺殺之妖術之足以惑衆如此錄以爲戒

帝出至金營奉表降何臬等喜和議成歸都堂懽會飲酒

南道總管范致虛率兵入援以僧宗印爲叅議遇金兵不戰而潰

八代紀要卷之二十四

八代紀要卷之二十五

明 吳興 顧應祥 編集

大埔黃宸校刊 江陰湯明善

庠生倪備同校

丁未宋高宗建炎元年

五月改

西遼德宗康國元年

夏崇宗正德元年

春正月詔兩河民降金不從

金人索金銀邀帝入營以孫傳輔太子監國帝與

何凜李若水復如青城閣門宣贊舍人吳革曰天

文帝座甚傾恐墮虜計凜不聽

河東割地使劉韜自縊于金營

二月金粘沒喝以其主命廢上皇及帝爲庶人令別立異姓邀上皇及后妃宗戚俱至金營吏部侍郎李若水死節

金人命翰林承旨吳玘吏部侍郎莫壽令推立異姓堪爲人主者且邀上皇出城京城巡檢范瓊逼上皇與太后御犢車出宮諸王及妃公主駙馬六宮有位號者皆行獨元祐皇后孟氏以廢居得免初金人以內侍鄧述所具諸王妃主名檄開封尹徐秉哲盡取之秉哲令坊巷五家

爲保毋得藏匿凡得三千餘人衣袂相聯屬而往金人逼帝及上皇易衣若水抱帝而哭罵賊而死金人又逼上皇召太子皇后孫傳爲太子傳從之按范瓊輩俱宋臣子也大勢已去反爲賊用爲人君者可不懼哉

金人大括金帛殺戶部尚書梅執禮等

三月金立張邦昌爲帝國號大楚吳革率衆討邦昌范瓊殺之

夏四月金人執二帝及后妃宗戚北去

宋自太祖庚申受禪至丁未凡九主一百六十

七年而爲金人所虜改爲南宋

自古中華之主受夷狄之禍者莫甚於宋丘學士濬謂非獨天數亦人謀之不臧其始都汴無險可據已爲失策又不能權宜如唐之明皇德宗出外避敵以圖興復以愚觀之縱使避敵但可以免全家係虜之辱欲恢復中原恐不可得蓋宋之君臣非唐之君臣也內無李泌陸贄以爲之相外無郭子儀李晟之爲將上下一於柔懦徒知請和乞憐苟延旦夕而無久遠之謀且多難之際而又彼此相傾以希寵竊位安往而不敗乎

張邦昌以呂好問言請廢后孟氏爲宋太后

邦昌立孟后策語有云尚念宋室之初首崇西宮之禮蓋用太祖即位迎周太后入西宮故事史謂識者知邦昌之心非真爲趙氏也愚謂邦昌一人臣耳豈可擅立宋后必上請康王即位而立之方可

夏五月康王構即位于南京改元建炎遙尊靖康帝爲孝慈淵聖皇帝尊哲宗廢后孟氏爲元祐太后遙尊母韋氏爲宣和皇后遙立夫人邢氏爲皇

后 以黃潛善爲中書侍郎 汪伯彥同知樞密
張邦昌爲太保封同安郡王五日一赴都堂叅決
大事 耿南仲免 召李綱爲尚書右僕射兼中
書侍郎 張叔夜至白溝扼吭而死 以李綱言
安置張邦昌于潭州并安置王時雍徐乘哲吳玠
莫儔李擢孫覲于遠州 贈李若水劉韜死節
宗澤屢敗金人以爲東京留守請帝還京師不報
虜斡離不死 何桌至燕山不食而死
更號元祐太后爲隆祐太后
尚書省言元字犯祖諱故以隆祐宮名易之夫

元祐乃哲宗年號也哲宗既不諱至后乃諱之

宋儒之迂如此

侍御史張浚劾李綱罷提舉洞霄宮尋安置于萬

安軍 太學錄陳東布衣歐陽澈上疏留李綱斬

于市

張邦昌通禁中華國靖恭夫人事覺賜死併誅王

時雍等 以王倫爲刑部侍郎使金始得二帝起

居 金人復入寇

是年西遼耶律大石始建都于虎思斡耳朶改元

康國 夏改元正德

戊申 宗澤敗金兀朮兵于東京請帝還京 以劉豫為

濟南知府豫降金 楊時致仕 定詩賦經義試

士法 金以宇文虛中為金國祈請使虛中降金

宗澤卒

二帝至會寧金以太上皇佶為昏德公淵聖帝桓

為重昏侯徙韓州

以黃潛善汪伯彥為尚書左右僕射帝曰以潛善

為左相伯彥為右相何患國事不濟時金兵橫行

盜賊蜂起二人皆不以聞

是年金始撰國史 金粘沒喝陷襲慶府軍士欲

發孔子墓禁之

巳酉 金人襲揚州帝奔鎮江從瓜埠小舟渡江至杭治

行宮以呂頤浩為樞密守鎮江

初張浚極言金人必來黃潛善汪伯彥以為過

慮而笑之及金兵至二人方率同列聽浮屠克

勤設法罷會食堂吏大呼曰駕已行矣二人方

倉皇策馬南馳居民爭門而出死者相枕籍無

不怨憤司農卿黃鶚至江上軍士誤以為潛善

罵之鶚方辯而首已斷矣高宗之用相如此而

自謂得人不明孰甚焉

求直言赦死罪以下放還士夫被竄者惟李綱不
赦潛善等欲謝金人故也 黃潛善汪伯彥自知
不爲衆所容求免以葉夢得張澂爲尚書左右丞
朱勝非尚書右僕射兼中書侍郎

扈從將苗傅劉正彥以功賞不明作亂殺同簽樞
密汪淵內侍康履等劫帝傳位皇子粦年三歲改
元明受請隆祐太后孟氏臨朝尊帝爲睿聖仁孝
皇帝以顯寧寺爲宮徙居之

夏四月張浚呂頤浩兵入帝復位傅正彥走韓世
忠劉光世捕獲斬之

苗傅等劫帝禪位罪不可追然皆上失其政以
致之豈可盡歸咎于下哉

朱勝非頰岐王孝廸張澂路允廸盧益俱免以呂
頤浩爲尚書右僕射兼中書侍郎李邴爲尚書右
丞

詔改尚書左右僕射並帶同平章事改門下中書
侍郎爲參知政事以李邴參政

立皇子粦爲皇太子秋七月卒謚元懿

徽猷閣待制洪皓使金不屈流遞冷山帝遺粘沒
喝書願去尊號用金正朔比于藩臣

八代紀要 卷之三十五 六
以司勳員外郎趙鼎言始罷王安石配享孔子
范瓊下獄死

范瓊逼勒二帝赴金營又附張邦昌僭逆誅之
晚矣

升杭州爲臨安府 呂頤浩尚書左僕射杜充右
僕射並同平章事

是年帝爲金兵所逼走越州明州航于海隆祐太
后奔虔州 起居郎胡寅上七策呂頤浩惡其切
直罷之 江淮統制岳飛敗金人于廣德

庚戌 帝泛海至温州還越 鼎州人鍾相作亂陷澧州

自稱楚王改元天載湖北捉殺使孔彥舟平之其
黨楊大復聚衆于龍陽 韓世忠敗金人于江中
岳飛敗金人于靜安以爲通泰鎮撫使

金徙二帝居五國城去上京東北千里以上皇六
女爲宗婦 金立劉豫爲齊帝世修子禮都大魯
府僞尊其母翟氏爲皇太后妾錢氏爲皇后改明
年爲阜昌元年

張浚兵敗于富平 冬十月秦檜自金還始王和
議

是年金禁度僧道及繼父繼母男女無相嫁娶

辛亥紹興元年

正月改

夏四月隆祐太后孟氏崩年五十九謚昭慈獻烈
作大宋中興玉寶 秋七月封太祖後令話爲安
定郡王 張浚以吳玠譖言下前威武大將軍曲
端于恭州獄武臣康隨與端有隙命獄吏以紙糊
口燭之以火渴求飲與之酒九竅流血而死軍士
惆悵

以秦檜爲尚書右僕射兼知樞密院事呂頤浩爲
尚書左僕射同平章事兼知樞密院事
初置見錢關子 升越州爲紹興府

壬子

帝自紹興如臨安初御講殿

劉豫徙居汴尊其祖考爲帝置于宋太廟是日大
風捲旂屋瓦皆振其子麟籍鄉兵十餘萬爲皇子
府兩京冢墓發盡

衍聖公孔端友卒以其子玠嗣

六月太祖後秦王德芳五世孫侑子伯琮育于宮
中賜名瑗 頒黃庭堅所書戒石銘于州縣

秦檜免榜其罪于朝 以朱勝非爲尚書左僕射

同平章事兼知樞密院事 以呂頤浩言罷李綱

提舉崇福宮 召張浚知樞密院事 呂頤浩朱

勝非以國用不足初置浙江湖南月椿錢橫賦爲
民害

是年金主以其兄孫合刺爲諳班勃烈合刺即名
亶

諳班勃極烈國之儲貳也初阿骨打傳位于弟
故復以位還兄之孫夷狄不忘所自如此

金以其子蒲盧虎爲國論勃極烈粘沒喝爲都元
帥兀朮爲副元帥

南平王李乾德卒以其子陽煥爲交趾郡王

癸丑 楊太僭號大聖天王復名么立鍾相少子子儀爲

太子臣事之

岳飛平江廣群盜賜精忠旂 起復朱勝非爲尚

書右僕射 呂頤浩免 復置博學宏詞科及元

祐十科取士法

劉豫以孔子後璠襲封衍聖公主祀事

甲寅 章誼使金請兩宮及河南地

吳玠大敗金人于僊人關 中丞辛炳劾張浚跋

扈不臣罷爲資政殿學士居福州 岳飛復襄陽

朱勝非終制趙鼎爲尚書右僕射兼知樞密院

韓世忠大敗金師于大儀 帝親征次平江

起張浚知樞密院視師江上

金兵北歸

乙卯

金熙宗仍天會 夏崇宗大德元年

帝還臨安以趙鼎張浚爲尚書左右僕射並兼知

樞密院 始建太廟 封周後柴叔夏爲崇義公

龍圖閣直學士楊時卒 胡寅上疏諫和議不聽

出知邵州 岳飛破楊么湖湘平 徵和靖處士

尹焞于涪州

是年上皇崩于金五國城年五十四在虜地八年

而亡遺言欲葬內地金主不許遙謚爲聖文仁德

顯孝皇帝廟號徽宗後梓宮還加號體仁合道駿

烈遜功聖文仁德憲慈顯孝皇帝

春正月金主晟卒年六十一謚文烈皇帝廟號太

宗葬和陵皇統四年改恭陵五年增謚號曰體元

應運世德昭功哲惠仁聖文烈皇帝諱班勃極烈

亶即位是爲金熙宗亶太祖阿骨打嫡孫也追謚

其父爲景宣皇帝廟號徽宗詔偽齊劉豫稱臣勿

稱子

金遣萬戶胡沙虎伐蒙古

蒙古在女直之北唐爲蒙兀部亦號蒙骨斯其

人勁健善戰夜中能視以鮫魚皮爲甲可捍流
矢是爲胡元之先通鑑博論載元朝祕史云元
之先是蒼色狼與糝白色鹿相配而生蓋獸種
也理或有之

丙辰 吏部員外郎陳公輔論王安石學術壞天下以爲
左司諫 以秦檜爲行營留守叅決尚書省樞密
院事

陳公輔乞禁程氏學

陳公輔論安石是矣論伊川則非但所謂幅巾
大袖高視濶步切中後世僞學之弊恐當時亦

有此輩以亂真也

是年西遼耶律大石卒在位二十年年五十八廟
號德宗子夷列年幼遺命皇后塔不煙稱制號感
天皇后改元咸清

丁巳 張浚兼樞密使秦檜爲樞密使 何藪自金還始

知太上皇及太上皇后已崩遙尊宣和皇后韋氏
爲皇太后 韓世忠岳飛請復中原不報

張浚罷趙鼎爲尚書左僕射同平章事兼樞密使
安置張浚于永州 尹焞爲崇政殿說書

是年金廢劉豫爲蜀王 金始用大明曆改明年

為天眷元年

交趾郡王李陽煥卒子天祚嗣

戊午

金天眷元年

定都臨安 胡安國進春秋傳 以秦檜為尚書

右僕射兼樞密使 趙鼎罷 孫近叅知政事

王倫以金使張通古來歸河南陝西地詔諭江南

秦檜攝冢宰受書詔 群臣諫和議不聽

秦檜以勾龍如淵為御史中丞劾去異議者

直學士曾開以不草國書罷 樞密院編脩胡銓

切諫貶監廣州都鹽倉

己未

金以經義詞賦兩科取士始頒官制

尹焞提舉萬壽觀兼侍講以和議為非不拜

王倫為東京留守交三京及河南陝西地

金魯國王行臺丞相撻懶反殺之以撻懶主割地

于宋乃執王倫

是年夏主乾順卒謚聖文皇帝廟號崇宗長子仁

孝立年十六是為仁宗

庚申

夏仁宗大慶元年

李綱卒 安置趙鼎于潮州

金人悔割地分道南侵復陷河南陝西州郡

東京副留守劉錡大敗金人于順昌

岳飛敗金人於郾城追至朱仙鎮大破之入汴修

治陵寢中原將復秦檜連發金字牌十二道召

飛班師中原復陷祕閣脩撰張九成等言和議

非計坐貶

金封孔子後四十六代孫璠為衍聖公

夏改元大慶

辛酉

金皇統元年

是年春正月金主初服袞冕群臣上尊號曰崇天
體道欽明文武聖德皇帝大赦改元

金封太上皇為天水郡王淵聖皇帝為天水郡公

秦檜主和議罷諸將兵權以韓世忠張俊為樞密

使岳飛為副使尋罷岳飛為萬壽觀使韓世忠亦

罷秦檜為尚書左僕射帝上表稱臣于金以

淮水為界割唐鄧商秦地及歲貢銀絹二十五萬

兩匹

是年十一月秦檜與張俊謀下岳飛于大理獄諫

議大夫万俟卨附和殺之年三十九岳雲張憲皆

棄市金主親祀孔子

加致仕官三品者給半俸

壬戌

西遼仁宗紹興元年

夏四月策進士以秦檜乞養子熺為第一檜改為次而陳誠之為首誠之專主和議故也

金遣劉筈以袞冕冊帝為大宋皇帝 金主立其子濟安為太子尋卒金立太子始此

秦檜竄胡銓于新州 以万俟卨為叅知政事使金報謝

金人歸徽宗及顯肅皇后鄭氏懿節皇后邢氏之喪 太后韋氏回自金

秦檜進封秦魏兩國公辭不拜 以秦檜子熺脩

日曆凡詔書章疏稍及檜者俱更易焚棄

是年西遼感天后蕭氏卒子夷列立是為仁宗改

元紹興

癸亥

始築園立社稷壇立貴妃吳氏為皇后 行人洪

皓朱弁張邵自金還皓忤秦檜出知饒州

是年建陽朱熹中第五甲進士

金始建宗廟社稷

甲子

夏人慶元年

金以王倫為三路轉運使倫不屈縊殺之

万俟卨使還秦檜假金人譽已數千言属卨以聞

尚不從檜諷言官李文會詹大防論尚逐去
徙趙鼎于吉陽軍 秦檜恐人議已禁野史
是年樂平縣二水鬪

夏改元人慶

乙丑

分經義詩賦爲兩科取士 幸秦檜第

丙寅

金殺宇文虛中 劉豫死

丁卯

安置洪皓于英州 趙鼎卒于吉陽軍

張浚論時事忤秦檜貶連州

金屢討蒙古不克與之和議割西平河以北二十
七團寨與之歲遺牛羊米豆冊其酋熬羅極烈爲

蒙輔國王不受自號大蒙古國自稱祖元皇帝改

元天興

戊辰

以秦熈知樞密院復爲觀文殿學士兼侍讀

竄胡銓于海南

金以完顏亮平章政事元末死

己巳

金亮天德元年 夏天盛元年

金以完顏亮爲太保領三省事 冬十月金主殺
其弟常勝殺其后裴滿氏而以常勝妃撒卯繼之
十二月金完顏亮弑其主亶而自立改元天德廢
亶爲東昏侯大定中追謚武靈皇帝廟號閔宗二

十七年改號熙宗是年夏改元天盛

庚午 殿司軍士施全刺秦檜不克詔磔于市 秦檜有疾詔執政赴其第議事入朝命肩輿入宮門二孫扶掖升殿不拜

是年金主亮群臣上尊號曰法天膺運睿武宣文大明聖孝皇帝 金亮殺其宗室太宗子孫七十餘人粘沒喝子孫三十餘人諸宗室五十餘人

亮乃太祖之後忌太宗後強盛故殺之

辛未 咸平王韓世忠卒

金主亮納其宗婦于宮中其叔阿魯補為亮所殺

乃納其妻阿懶為昭妃

壬申 金主亮命崇義軍節度使烏帶之妻唐括定哥殺

其夫而納之後與舊奴姦賜死

癸酉 金貞元元年

金遷都于燕改元貞元以燕京為中都汴京為南京中京為北京上京為會寧府 金主生母大氏卒遺命迎其嫡母徒單氏 金主亮召葛王烏祿妻烏林答氏于濟南妻謂烏祿曰我不行上必殺王我當自勉行至良鄉自殺

按金夷狄之俗無復人理而烏林答氏乃能守

節又克全其夫真可嘉尚故特書之

甲戌

西遼承天后崇福元年

以孔子五十代孫播襲封衍聖公 以秦檜孫塤

修撰實錄塤省試殿試俱第一及廷試知貢舉湯

思退以塤第一帝改為第三 加秦熈少傅嘉國

公金主亮納其諸從姊妹于宮 金製交鈔庫製鈔

始是年西遼主夷列卒廟號仁宗子幼遺命其妹

普速完權國號承天后改元崇福

乙亥

進封秦檜建康郡王加秦熈少師並致仕是夕檜
死贈申王謚忠獻

丙子

金亮正隆元年

復趙鼎等官 以沈該為尚書左僕射万侯高右

僕射並同平章事 湯思退知樞密院事宰相不

兼樞密 万侯高主和固位無異於檜士論薄之

八閱月卒 是年欽宗崩于金

金主亮群臣上尊號曰聖文神武皇帝二月改元

正隆

丁丑

湯思退為尚書右僕射同平章事

戊寅

己卯

召潭州南嶽廟朱熹不至 湯思退為尚書左僕

射陳康伯右僕射同平章事 皇太后韋氏崩

庚辰 以太祖七世孫秀王之子普安郡王瑗為子更名

瑋封建王 遣虞允文如金賀正旦

湯思退有罪免 初行會子

辛巳 金世宗大定元年

分經義詩賦為兩科取士 陳康伯為尚書左僕

射朱倬右僕射同平章事

金使來求漢淮地始知欽宗已崩

完顏亮欲大舉南侵故遣僉樞密高景山右司

員外郎王全賀天申節數宋焚南京宮室沿邊

買馬招亡納叛之罪厲聲詆責以激怒起釁又

曰趙桓死矣帝始發哀罷詔持斬衰三年廟號

欽宗

金亮遷都于汴殺遼及宋子孫在其國者凡百三

十餘人惡其嫡母徒單后諫伐宋發詔令后跪聽

縊而弑之焚于宮中棄骨于水亮與后婢高福娘

私通縊后者高福娘也封為勛國夫人

金亮將三十二總管入寇軍士多道亡者至采石

為虞允文所敗時金人已立太祖孫睿宗子曹國

公烏祿為主烏祿即葛王也更名雍改元大定是

為金世宗光天興運文德武功聖明仁孝皇帝下
詔暴亮之罪追謚東昏王為帝廟號閔宗

金完顏元宜弒其主亮於揚州龜山寺明年追廢
為海陵王謚曰煬後降為庶人

壬午

虞允文請恢復以為川陝宣諭使與吳璘經畧中
原 洪邁使金正敵國之禮

立瑋為皇太子更名春年三十四

夏六月傳位太子自稱太上皇居德壽宮改明年

為隆興 虞允文罷

金追廢亮為海陵郡王

金故遼人移刺窩幹稱帝改元天正僕散忠義討
平之

八代紀要卷之二十六

明吳興顧應祥編集

大埔黃宸校刊 江陰湯明善

庠生倪佩同校

癸未宋孝宗隆興元年

史浩爲尚書右僕射同平章事兼樞密使帝銳意
恢復浩與張浚論議不合被侍御王十朋劾罷知
紹興府 張浚遣李顯忠邵宏淵伐金宏淵與顯
忠不和師潰于符離士大夫主和者附湯思退貶
浚治揚州帝厚浚復召用顯忠安置筠州卒宏淵

仍前都統

按宋孝宗雖有恢復之志而在朝諸臣皆不過貪位慕祿而無忠君愛國之誠心符離之敗不過失其所守之地耳而群議紛然又不罪邵宏淵而專罪李顯忠國是如此使志士何以立功乎

以湯思退爲尚書右僕射兼樞密使遣王之望如金議和許割金所求唐鄧海泗四州地減歲幣之半召峽州處士郭雍不至賜號冲晦處士金以孔總襲封衍聖公

甲申

魏公張浚卒湯思退免永州居住太學生張觀等伏闕論其姦邪誤國乞斬以謝天下行至信州憂悸而死復以陳康伯爲尚書左僕射兼樞密使錢端禮叅知政事兼樞密院虞允文同知樞密金主命以女直字譯經史

乙酉乾道元年

春正月朔合祀天地于圜丘改元

魏杞使金正敵國禮而還國書稱姪宋皇帝奉書叔大金皇帝歲幣二十萬立長子鄂王愔爲皇太子洪适爲尚書右僕射同中書門下平章事

兼樞密使

丙戌 金群臣上其主尊號曰應天興祚仁德聖孝皇帝
洪适罷 葉顥魏杞為尚書左右僕射兼樞密使
金命女直人習進士業

丁亥 虞允文知樞密院事 秀王夫人張氏卒帝成服
于後苑 皇太子卒 冬十一月合祀天地于圜
丘雷葉顥魏杞俱免
金主不信佛法

戊子

西遼直魯古天禧元年

蔣芾為尚書右僕射同平章事兼樞密制國用使

以母喪去起復為左僕射陳俊卿右僕射同平章
兼樞密芾乞終制許之 追封韓世忠為蘄王

李燾進通鑑長編

西遼承天后普速完與駙馬蕭朶魯不之弟朴古
只沙里通殺駙馬駙馬之父斡里刺以兵殺普速
完及朴古只沙里立仁宗次子耶律直魯古為帝
改元天禧

己丑

以陳俊卿虞允文為尚書左右僕射同平章事兼
樞密使

庚寅

春二月帝從上皇幸聚景園 陳俊卿罷

遣起居郎范成大如金求陵寢地

夏相任得敬脅其主仁孝中分其國請命于金金主不許

是年高麗翼陽公皓廢其君現而自立

辛卯

夏乾祐元年

上太上皇尊號光堯壽聖憲天體道太上皇帝作敬天圖立恭王惇為皇太子年二十五

金致仕官七十以上給半俸金以一品禮葬故宋帝桓於鞏洛金祀圜丘群臣上尊號曰應天興祚欽文廣武仁德聖孝皇帝

夏改元乾祐

壬辰

春二月改左右僕射為左右丞相以虞允文梁克家為之並兼樞密使左司員外郎兼侍講張栻

罷朱熹修資治通鑑綱目成虞允文罷

金除金銀坑冶稅聽民自採

癸巳

贈蘇軾太師梁克家罷曾懷為右丞相

十一月合祀天地于圜丘改明年為淳熙元年

金初以策試國子金復以會寧府為上京

金大名府僧李智究等謀反伏誅

甲午淳熙元年

交趾入貢封李天祚為安南王始稱國

雍公虞允文卒 曾懷罷葉衡為右丞相兼樞密

使

乙未 宴輔臣玉津園 太上皇七十上尊號光堯壽聖

憲天體道性仁誠德經武緯文太上皇帝

高麗叛將趙位寵以四十餘城降金金主不受

丙申 召朱熹為秘書郎不至 立貴妃謝氏為皇后

罷鬻爵 金命京府設學養士

是年安南王李天祚卒子龍翰嗣

丁酉 始罷王雱從祀孔子

金主命群臣毋面從 高麗致貢于金

金主葬宋遼宗室被海陵所害者于河南廣寧舊

陵

戊戌 以史浩為右丞相兼樞密 朱熹知南康軍

范成大叅政六月罷 金主禁荆興寺觀

己亥 錄趙鼎岳飛後以京秩 知南康軍朱熹上疏

金主命史書載事貴實不必浮辭諂諛

庚子 呂祖謙作大事記

是年張栻卒胡銓卒

辛丑 王淮為右丞相 以朱熹提舉浙東常平茶鹽以

其社倉法行諸路

金主追廢完顏亮為庶人

壬寅 以王淮梁克家為左右丞相

癸卯 夏六月監察御史陳賈請禁道學

金譯經史子書頒行

甲辰 周必大為樞密使

乙巳 太上皇八十加上尊號曰光堯壽聖憲天體道性

仁誠德經武緯文紹業興統明謨盛烈太上皇帝

金太子允恭卒以孫原王麻達葛判大興尹

金禁含胎採捕

丙午 賜處士郭雍號頤正先生 是年八月五星聚于

軫 五月金以大興尹原王麻達葛為右丞相賜

名璟 十一月立璟為皇太孫

金世宗久任外官知民間疾苦故其立太孫也

必先使之為大興尹為右丞相而後立之後世

之為宰輔者乃不歷民事而一以文學之臣為

之可乎

丁未 以周必大為右丞相 施師點知樞密院留正叅

知政事 大理寺奏獄空

冬十月太上皇崩年八十二謚聖神文武孝憲皇

帝廟號高宗帝行三年喪 顏師魯如金致遺物
坐主見其中有玉器五玻璃器二十及弓劍之屬
命還之

金禁國人學南人衣飾 改閔宗廟號熙宗

戊申 葬高宗永思陵 王淮罷 以朱熹為崇政殿說
書辭不至

金建女直太學

己酉 以周必大留正為左右丞相 二月帝傳位太子

惇自稱壽皇居重華宮第三子惇即位年四十四

是為光宗尊帝為壽皇聖帝 皇后為壽成皇后皇
太后為壽聖皇太后

立皇后李氏 國子祭酒何澹求周必大遷官不

從留正奏遷之為諫議大夫以私憾劾罷必大

朱熹著大學章句成

是年正月金主雍崩壽六十七謚光天興運文德
武功明仁孝皇帝廟號世宗葬興陵太孫璟即位
是謂章宗

金世宗真賢君也雖中華之主亦鮮及之號為

小堯舜宜矣以夫人烏林答氏守節而死終身

不立后漢唐諸君能之乎

庚戌宋光宗紹熙元年

金章宗明昌元年

以留正為左丞相王蘭為樞密使尋罷葛邲代之
胡晉臣叅政 知漳州朱熹請行經界法

金以孔元措襲封衍聖公

辛亥 李后妬殺黃貴妃合祭天地于園丘大風雨不能
成禮帝有疾李后譖壽皇欲廢立帝惑之不朝重
華

壬子

癸丑

陳亮及第

葛邲為右丞相

趙汝愚知樞密

以朱熹知潭州

金以孔文遠襲封衍聖公

是年夏主仁孝卒年七十在位五十五年謚聖德
皇帝廟號仁宗長子純佑立年十七

甲寅

夏桓宗天慶元年

壽皇疾帝與李后遊玉津園不視留正引帝裾泣
諫不從 夏六月壽皇崩年六十八帝稱疾留正
等請壽聖皇太后代行喪禮尊壽聖為太皇太后
壽成皇后為皇太后 秋七月留正請建太子不
從而遁趙汝愚韓侂胄等請太皇太后詔立太子
嘉王擴襲位於重華宮年二十七尊帝為太上皇
帝皇后為太上皇后以崇國夫人韓氏為皇后召

留正復視事尋罷

趙汝愚為右丞相韓侂胄兼樞密使承旨改明年為慶元元年以朱熹為煥章閣待制兼侍講內批罷

上壽皇謚曰哲文神武成孝皇帝廟號孝宗權擯于永阜陵慶元三年加謚紹統同道冠德昭功哲文神武明聖皇帝

乙卯宋寧宗慶元元年

韓侂胄引李沐為右正言劾罷趙汝愚竄永州行至衡州疾作衡守錢鏊希韓侂胄旨窘辱暴卒

以余端禮為右丞相

金給欽宗族屬田宅修曲阜宣聖廟賜衍聖公

以下三獻法服樂一部

丙辰

金承安元年

以余端禮京鏜為左右丞相謝深甫叅政削朱熹官竄處士蔡元定于道州何澹攻道學得叅政冬十一月金主有事于南郊改元承安

丁巳

貶留正邵州籍趙汝愚留正周必大王蘭并朱熹等五十九人為偽學

冬十一月太皇太后吳氏崩

戊午 禁偽學

加韓侂胄少傅封豫國公 育太祖十

世孫與愿于宮中年六歲 知臨安趙師異附侂

胄為工部侍郎

巳未

加韓侂胄少師封平原郡王

庚申

春正月皇子坦生 二月朱熹卒 京鏜謝深甫

為左右丞相何澹知樞密院 太上皇后李氏崩

秋八月光宗崩年五十四謚憲仁聖哲慈孝皇帝

廟號光宗葬永崇陵 京鏜死 韓侂胄以其童

子師陳自強僉書樞密院 十二月改明年為嘉

泰元年

金改明年為泰和元年

辛酉嘉泰元年

金泰和元年

西遼亡

春正月臨安大火 何澹罷陳自強參政

吳曦納賄賂宰輔陳自強言于韓侂胄得興州都

統制譖罷副都統王大節得專兵權懷異志

何澹罷

是年西遼主直魯古出獵乃蠻王屈出律伏兵擒

之而據其位尊直魯古為太上皇朝夕問起居以

侍其終西遼遂絕

西遼自耶律大石於乙巳年建號漠外傳四世

七十六年為乃蠻所滅連前共十三世二百二十六年

壬戌 禁私史 立楊貴妃為后 加韓侂胄太師

弛偽學禁追復趙汝愚朱熹等官

癸亥 謝深甫罷 以陳自強為右丞相

加謚光宗循道憲仁明功茂德溫文順武聖哲慈孝皇帝

甲子 韓侂胄定議恢復 追封岳飛為鄂王

是年高麗王暲卒子諲立

十二月改明年為開禧元年

乙丑開禧元年

詔韓侂胄平章軍國事 蘇師旦為安遠節度使

領閣門事

丙寅

蒙古太祖奇渥溫鐵木真潛號

追奪秦檜爵改謚繆醜 陳自強主議伐金

四川副宣撫吳曦以階成和鳳四州獻于金求封

為蜀王

以太祖九世孫希瞿子均為孝宗孫沂王柄後賜

名貴和 下詔伐金告天地廟社

伐金師屢敗韓侂胄始覺蘇師旦所誤罷其官安

置韶州 以張巖知樞密院事李壁參政

是年夏崇宗孫越王仁友子李安全廢其主純佑

自立改明年為應天純佑尋卒年三十在位十四

年謚昭簡皇帝廟號桓宗

蒙古奇渥溫鐵木貞成乃蠻即位于斡難河之北

建九斂白旗群臣上尊號曰成吉思皇帝是謂元

太祖

丁卯

夏襄宗應天元年

皇子圻生尋卒 太皇太后謝氏崩

吳曦僭號于興州自稱蜀王改元轉運使安丙及

興州中軍正將李好義討平之

遣方信孺使金還傳虜欲反俘增幣割地稱臣及

縛送首謀之人韓侂胄怒貶信孺于臨江軍復遣

王倫子王柎如金

冬十一月禮部侍郎史彌遠與楊后密計誅韓侂

胄并遣使斬蘇師旦于韶州 立榮王曦為皇太

子更名懣 陳自強罷 以錢象祖為右丞相兼

樞密使衛涇雷孝友參政史彌遠同知樞密林大

中僉書 改明年為嘉定元年

戊辰嘉定元年

王柵至金議世爲伯姪增歲幣三十萬犒軍銀三百萬仍獻韓侂胄首以贖淮南地三月以韓侂胄蘇師旦首獻于金 復秦檜爵謚 臨安大火以錢象祖史彌遠爲左右丞相象祖尋罷史彌遠母喪去

金主璟卒年四十一無嗣以世宗第七子叔衛王興勝柔弱遺命立之更名永濟

韓侂胄聽小人之言欲立蓋世之勲以自固又因辛棄疾一言乃與蘇師旦議銳意恢復夫既知金國必亂則當養民練兵如勾踐之卧薪嘗

膽使內治修明觀釁而動可也顧乃無故激怒其使以啓兵端卒之函首虜廷爲天下笑胄不足惜其辱國甚矣豈不可恨也哉

巳巳

金衛紹王大安元年

起復史彌遠爲右丞相 皇太子更名詢 謚朱熹曰文

金改元大安謚璟爲憲天光運仁文義武神聖英 孝皇帝廟號章宗 畏吾兒國降于蒙古

庚午

夏皇建元年

夏改元皇建

蒙古侵金

辛未

夏神宗光定元年

遣使如金不至而還

金求和于蒙古不許金兵屢敗蒙古入金居庸關
夏主李安全卒年四十二在位六年謚敬穆皇帝
廟號襄宗有子承禎不立齊國忠武王彥宗之子
大都督府主遵頊立改元光定

壬申

金崇慶元年

春正月金改元崇慶

安南王李龍翰卒子吳昂嗣尋卒無嗣以女昭聖

主國壻陳日照襲取之李氏自公蘊八傳凡二百
二十餘年為陳氏所襲

癸酉

金至寧元年九月後宣宗貞祐元年

夏五月金改元至寧 秋八月金右副元帥胡沙

虎廢其主朮濟囚于衛邸取璽堂璽鄭氏不許胡
沙虎使宦者李思中弒朮濟欲僭位未決訪于丞
相徒單鑑迎顯宗長子昇王珣於彰德立之改元
貞祐廢朮濟為東海郡侯 金立其子守忠為太
子 故遼人耶律留哥取金遼東州郡自立為遼
王改元元統

金术虎高琪與蒙古戰敗績師還殺胡沙虎

甲戌 金人求歲幣起居舍人真德秀建議不與

金遣完顏承暉納金銀繒帛各萬兩足求和于蒙

古又以故主永濟女歸蒙古是為公主皇后蒙古

兵北歸 夏五月金主遷都于汴

蒙古怒發兵圍燕

金濰州紅襖賊李全兵起

乙亥 以真德秀為江東轉運副使

金太子守忠卒

蒙古克燕金右丞相完顏承暉死節

丙子 金追復故主永濟衛王謚曰紹

金立遂王守禮為皇太子更名守緒

蒙古克金潼關

遼王留哥降于蒙古

丁丑 金興定元年

詔伐金募民納粟補官以助軍興

定遠民季先以李全來歸

蒙古圍夏興州夏主遵頊出奔西涼州

金定僧道納粟補監寺威儀之令

秋九月金改元興定 尚書省以軍儲不繼乞罷

府州學生廩給金主不許

戊寅 以李全為京東路總管

金遣使求和不納遂使太子守緒以兵入寇

己卯 夏請會師伐金

金築汴京裏城河北郡縣俱降蒙古

蒙古伐西域諸國

庚辰 皇太子詢卒謚景獻 十二月得恭膺天命寶

蒙古耶律楚材進庚午元曆

金復故主東海郡侯永濟為衛王

是年金求和蒙古遣使回答欲割關西地封金主

河南王

金史衛紹王紀作貞祐四年復衛王宣宗紀於

是年復衛王一事而前後不同如此今依宣宗

本紀

辛巳 立太祖十世孫沂王嗣子貴和為皇太子更名竑

年十五歲以宗室希璪之子貴誠為沂王嗣

壬午 金元光元年

進封皇子竑濟國公以沂王嗣子貴誠為邵州防

禦使 史彌遠使鄭清之教貴誠謀廢立

以李全為保寧節度使京東河北鎮撫節制司副

使 蒙古主征西域至忻都大掠

是年長星見西方 秋八月金以彗星見改元元

光

癸未

夏獻宗乾定元年

是年冬十二月金主珣卒年六十一謚繼天興統

述道勤仁英武聖孝皇帝廟號宣宗太子寧由速

即守緒即位改明年為正大元年

夏主遵頊傳位于其子德旺自稱上皇改元乾定

遵頊尋卒年六十四謚英文皇帝廟號神宗

蒙古初置達魯花赤監治郡縣

甲申

金哀宗正大元年

秋八月帝有疾史彌遠矯詔以沂王嗣子貴誠為

皇子更名的授武泰軍節度使封成國公閏月帝

崩年五十七史彌遠稱楊后旨以昀即位尊楊后

為皇太后垂簾聽政以皇子竑為濟陽郡王判寧

國府尋封濟王出居湖州以醴泉觀使就第改明

年為寶慶元年上大行皇帝謚曰仁文哲武恭孝

皇帝廟號寧宗追封希廬為榮王生母金氏為國

夫人以弟與芮襲封沂王奉祀 史彌遠欲收衆

望褒表老儒以楊簡為寶謨閣學士員德秀為直

學士魏了翁爲起居郎

金與夏平

是年蒙古征西域至東印度國駐鐵門遇角端見
班師

角端之事續通鑑載在元太祖十七年諸史會
編與通鑑纂要俱同通鑑以忻都國印度國爲
兩事纂要則併而爲一時遂以印度之鐵門爲
忻都國鐵門關皆不考之故今考元史本紀及
耶律楚材本傳乃在十九年甲申見於印度國
之鐵門非忻都也今改正

又按角端瑞獸好生惡殺如騶虞之類或載在
典籍惟耶律楚材平素博雅故知之若謂其能
人言則四方之言不同不知通蒙古之言耶抑
亦印度國之言耶未可全信也

有言則曰之言則本可全計也

入言則曰之言則不同不映而亦古之言則時

典錄郵通野焚林平漆物非姑映之於國其新

又字所備無增致主懸殊以顯真之誠友道五

